

四庫全書

集部

欽定四庫全書

集部
知非堂稿卷二

詳校官中書_臣孫衡

侍讀_臣孫球覆勘

總校官原任中允_臣王燕緒

校對官中書_臣吳俊

謄錄監生_臣董邦本

欽定四庫全書

集部五

知非堂稿

別集類四元

提要

臣等謹案知非堂稿六卷元何中撰中有通

鑑綱目測海三卷通書問一卷皆別著錄據

中自序所著尚有易類象三卷書傳補遺十

卷吳才老叶韻補遺一卷六書綱領一卷補

六書故三十二卷蘇丘述遊錄一卷措頤錄

十卷今皆未見惟此集僅存然自序稱有知
非堂稿十七卷外稿十六卷顧嗣立元詩選
載知非堂稿十七卷與自序合王士禎居易
錄作十六卷亦與自序外稿合此集止六卷
似非完書然嗣立之所錄與士禎之所稱者
已均在此六卷之中又似無所亡佚者豈後
人傳寫或合併其卷數抑或重為選錄汰其
繁冗故篇帙雖減而名章雋句一一具存也

詩集之富唐無若白居易宋無若陸游楊萬里而珠璣並存往往使後人以多為憾是編佳製具存而蕪詞較少可謂刊糟粕而存菁華即非足本亦不必以不完為歎矣乾隆四十四年四月恭校上

總纂官臣紀昀臣陸錫熊臣孫士毅

總校官臣陸費墀

提
要

知非堂稿原序

夫言之秩然次序條理者謂之文文無待於作也後之
人口之所言雜亂無紀則必締構於思撰造其辭而後
筆之於簡牘古人雖不作文孔子嘗云辭達而已矣此
固作文之大法也而奈何作者之不知此哉東漢以來
氣弱體卑無復有善作者至于今殆十餘年唐宋盛時
號為追蹤先漢而僅見韓柳歐陽曾王二蘇七人焉若
李習之若唐子西若張文潛非不遊韓蘇之門而竟未

與韓蘇合一也茲事豈可易視哉表弟何中太虛少負
逸才弱冠已能詩而亦用意於文至順二年春予臥病
顧予於病中授以大集予讀之蓋優優升七子之堂矣
予不勝其喜非私喜也喜斯學之不孤也斯學也雖非
儒者之本務而其格力之高下實氣運之盛衰關係又
豈小小哉病餘倦於書然喜之不極為書其後而還其
稿前翰林學士資善大夫知制誥同修國史草廬吳澂
伯清序

知非堂稿自序

臨川何中能言知讀書成淳士申甫髫隨父仕廣東曲江乙亥出嶺至元丙子僑居寧都隱避浮寄者三年已卯始從師問學師宋進士張叔方朱先甫羅士昂於前輩屢嘗親劉會孟識謝君直姚端夫王肯堂交甘詠之程鉅夫李士弘元復初揭傒斯全止所當世知名士多友善於吳伯清為姻兄弟云至大戊申如析津皇慶癸丑適東甌所著易類象二卷書傳補通十卷通鑑綱目

測海三卷通書問一卷吳才老叶韻補疑一卷六書綱
領一卷補六書故三十二卷蘇丘述遊錄一卷摺頤
錄十卷知非堂稿六卷知非外稿十六卷延祐庚申夏
六月朔臨川何中太虛自序

欽定四庫全書

知非堂稿卷一

元 何中 撰

五言古詩

別謝提刑

戊子十一月二十四日拜疊山先生於雙桐驛蓋先
伯見山同丙辰理宗親擢也先生叙舊好言同心焉
明日中賦二詩為別

我我樓觀地寂寂風雨墟可憐零落身萬里投修途

窅窅千蛾眉已奉他人娛主恩天罔極苟生豈良
圖行行重行行善保千金軀別懷不敢訴顧步復踟
蹰

二

吳門白日落孤妾悲洞房徒倚無所歸朔風滿羅裳昔
為春柳陰今作秋菊黃芳景不速盡愁心與俱長逝者
魂魄在九京共徜徉粲粲河壯水蕭蕭天雨霜出門即
遠道死生永相望

安上人蘭若

獨尋小蘭若積翠森松筠禽聲悟禪家幽花吐清芬
晴日水光合時飛野鴨羣娟娟前山秀適來何處雲清
心欣有得淡焉失腥氛道人煮春茗離坐與晤言亦忘
此境邃兩耳天樂聞何當脫世網於焉窮朝曛

菊

我畊不半畝黃花列千叢蕭條變衰時一夕萬里風孤
立不作難英英異風骨君看墻東客夜寒步霜月

又

黃花來何晚及此秋霜繁寄語山外人棄捐我何言幽
芳具四時要在培深根我來繞花行我道將無存

又

菊花如幽人梅花如烈士同居冰雪中標格不相似道
里阻荒塞故人萬里餘菊枝儻可折持以寄遠書

墨梅

客攜數尺紙手展墨色鮮江梅發踈花蕭然瞰清川澹

月掛寒枝孤幽弄芳妍豈非立彫後或是標春先日月
相往還何用悲歲年此花於此時好脩乃獨賢處士窮
幽居羈臣懷左遷裁詩孤山雪擁屨羅浮煙我今亦何
恨仰視空青天世俗不貴真共把墨粉傳玄帝雖令嚴
此花不俱玄于何幻素質物性亦復然夢中如聞香殘
更悟醉眠起來索梅花寂寞江之壖

讀史

桓桓韓將軍當年誰寄目豈無漂母食亦有胯下辱雄

劍一朝飛舉手拾秦鹿風雷走倏燥乾坤困馳逐滎陽
廣武間楚漢寄我足王業四百年尺封屢翻覆賞厚豈
勢搖功成乃身戮所貴英雄人豈甘草中伏誰為後來
者感此空碌碌舉頭見青天天邊有鴻鵠

又

羸法四海熱震蕩昏三光雲飛大風起赤子沐清涼當
時周旋人一瞰懼身殃悠悠赤松子不識為何祥千年
有崔浩前脩持自彰豈知媿所事乃是元家王恐非鳳

銜圖但見鴈求梁伊爾山中人勿棄蘭蕙芳

又

鼎移炎德燼南陽尚躬畊胸中經濟事感我三顧誠保
蜀非王基何似田一成顧豈志功名乃欲表忠精煌煌
漢家業草木豈無情誰知鄴中兒元是漢人生運去身
或移事往恨難平悠悠梁父吟終古有餘聲

穆山山中

江南有丘壑我生良獨閒秋風二三友竭來遊茲山山

深不見寺但見飛泉寒地行兩山挾天風鳴珮環青烟
從何來墮我泉林端未知有徑否鐘磬猶未殘長歌萬
谷應仰見數峰攢紆餘緣澗入側步寒雲闕豁然得空
曠聊復解破顏殿靜蘚花潤松危鶴聲乾僧竇炯數珠
相我槃礴觀大開雙白眼應接幾青鬢徘徊日已晚人
間行路難猛虎蔽叢薄潛蛟激風湍振衣出山去大嘯
驚人寰

雜述

姬末既文敝羸彊淪九疇炎德屹肇基王風遂迴輶繼
繼崇禪讓終始還相酬忽焉茲道絕魚羊莽齊州遙知
後來者亦與豐沛儔荒哉結繩初爾來幾千秋大化不
停運有生步其流此時偶際會昔昔射旄頭

又

天龍地用馬健順理亦宜誰於其兩間赤手握陰機東
門一長嘯四海皆驚迷向來種桃人此去當何之悠悠
黃唐遠來者邈難期龍逝白雲征馬輕九坂馳行行馬

上郎萬里長風吹不見長江邊折盡楊柳枝

又

月蠹挂不植桐枯鳳來遲高峯不顧返尚念榮與衰全
身古所貴逃名亦何為自昔青門人不識東陵時天地
始一息人道乃如斯昭文已無琴默與萬化齊但酌一
樽酒得醉聊自怡

又

蕭蕭白楊風依依吹井烟曠哉上下宇逝者不待年彼

隴亦何祥一日幾新阡誰招舉某復遮哭送九泉高樓
當西日落花滿寒川流浪曠劫間彭殤俱可憐漢陵春
蕭瑟回首尚變遷萬古一起滅此意何茫然

又

至人守玄宅寸虛莫能傾俯觀萬化機寓化亦寓生道
去終不復行葦有遺聲帝者獨何居混沌無聰明培風
高翮翔冥冥亂雲擁周流駕言旋夜寒烟霧重身如江
湖樽瓠落豈無用歸來無何鄉三珠倚孤夢

夜久

夜久

闕

步珠露空盈襟蕭條川氣高慘淡浦色侵河
橫星漸轉霧厚山將沉鳴蟲促繁響蜚螢亂寒陰時物
遂如此惻愴抱寸心天將落月去何當復東臨乾坤入
冥漠衆竅酣哀音欲令萬夢覺誰憂獨難任商歌浩忘
疲俯仰情逾深忽聞鷄聲起左右風滿林

讀晉史

林疎暑風劇牕戶殊未涼悠然倦不力吾我已俱忘眼

醒見周秦眼醉遊軒黃日月山外過興廢枕中藏振衣
起長嘯六合何軒昂斯人縱高視旁皇復旁皇于焉讀
晉史感激繫中腸言言不能已自笑已如狂

又

哀榮無盡變俯仰迷自推陳留既作賓何如山陽時中
都血流杵江左中興基不待卯金刀羸彊呂已移天道
巧相復人理固易知巢由遇高躅今古無還期

又

天地一虛器所寄在斯人人能主天地豈不貴我身嗟
哉嵇阮輩酒鄉為隱淪朝醉既及暮暮醉還及晨裸飲
或稱達喪闕 廼名真獨善諒非計況此國與民被髮祭
伊川豈不在諸臣平陽有餘恨千載同悲辛

又

蟄龍臥滄淵瑞鳳棲蓬海悠悠接輿歌千古消光彩出
處酌其宜勿為世所駭預人家國事此身固有在嗣宗
濟世心無為著達莊叔夜明養生東市援琴傷一出與

一處徒能決藩牆淳風竟不返二子俱亡羊汲郡蘓門
山其人遊何鄉我欲振奇翮碧宇追翱翔

又

高平釋時論魯褒錢神篇晉轍固難挽猶勝談虛玄夷
甫晚良悔將死復何言誰登平乘樓尚能議諸賢老莊
異端學冥合歸自然蕭曹相業大文景王道便尊尚本
非異興衰由此遷信知浮論者亡國有餘愆

又

江左二百年立國初何恃中夜荒鷄鳴天地皆英氣
戈劉越石擊楫祖士稚如此中原間端能了公事局促
并豫州竒功中道墜嗚呼二豪雄本為宗社計異類禽
獸心推議諒非意石死故可哀推則吾何議徒懷墟墓
間還念金行祀誰令若思來後代常歎欷

又

兩賢不相厄王庾乃如斯天步政多艱此豈私憤時
東山謝安石造次威鳳儀三賢抱宏器繼出相等夷風流

文雅盡同惟世所推但恨立朝間典禮殊未施玄談竟
澆俗逆臣終亂階湯武肇王業伊周垂綱維桓景彰伯
道管晏橫要規古人不作遠所立百世師奈何民具瞻
退食徒委蛇卜世固天定欲責當誰歸

又

春風滿南國公子爭為歡錦綉少花艷珊瑚耀日寒美
人佩蘭麝馳馬馳雕鞍酣歌金谷迥笑舞涼臺寬一朝
化為血付與來世歎人國亦如此榮落朝夕看悠悠勸

進者端似墜樓難

又

填石

闕

膠杯誰能舟我豈不知我量力乃哲謀有
才比管葛感奮為武侯保身慕夷齊靜退淵明儔物亦
非所忌名亦非所求北憲羲皇上東籬晉宋秋零陵一
杯酒終古屬斯愁

秋雨

昔者三月晴厚地裂欲隳積地一月雨厚地融欲糜不

知穹穹者若此何以為陰陽相鑿柄自怒還自怡風吹
黍稷黑下方人怨咨怨咨猶尚可寔自地難持我有斲
藥鏡子以待朝飢有聲不敢吐坐看松雪垂

偶書

桐寒葉落風菊淨花開雨掩映半畦秋好竹三四對
此憔悴人忽笑不復語

掩卷

掩卷如鬱鬱鬱鬱亦何似野人每多憂不悟本無事仰

觀千載前去者極所詣俯期千載後來者邈難至惟我
於其間欲策無名驥出門萬里遠寸挽何能至山空白
雲合日黑野風駛獨默已如瘖閒送飛鴉墜

次羅士昂韵別羅以通

桐花滿天地鳳衰竟何鳴豈無雙綵翼誰與相目成山
長迴風駛道暗浮雲征孤飛良獨苦吾道寧虧盈迺持
一箭書欲破萬古城寸心挽來世日月當回精我亦願
追隨難可覓形聲志合身復乖良晤何難并君持黃金

鞭微徑所不經我無匹雛力敢擬世上英豈知一日別
遂有千載情明發隔山雨何當與細評

遊芙蓉山十四首

十里五里石一步一長嗟行行山轉高悠悠日將斜
紫折抵深谷直下十數家來往自成村桃柳映桑麻崖杉
老絳葉石稜垂枯花陰凝四時雪陽燄一川霞誰令余
到此幽意浩無涯行將辦畚鍤來此畊山畬

又

岩岩青芙蓉峻秀琢寒玉危流千丈飛鏗鉤石相觸幽
閔魚龍宮荒寒霧雨蓄淒神不可留前登散遐矚參差
雜花動杳氣汎深谷日照丹霞開萬峰洗晴綠同心有
長鏡緩尋靈藥斲葛仙早見招庶得從所欲

又

春風吹衆樹春喚如鳴梭平煙帶遠村時聞樵者歌田
父有真樂東臯牧羣鵝烟煖衆草合艷綠如流波搔首
負白日歡然得婆婆事立或福的識深迺愁多西家酒

正熟況此天氣和

又

側足上翠微石磴八九折開盡滿崖花坐來羣香歇遊
目盡遠空亂數碧簪列草木頗葱蘢雲興復霞蔚不知
十日雨還長幾枝巖山中無事業特用慰採擷盈筐歸
路遙忽見滿山月

又

綠峰在頭上落月在脚下點點烟鬟開春晴真無價紅

泉響哀玉蒼石飲渴馬林窮蘭雪香崖古蘿衣挂屬聞
絕壑底松聲更清洒世遠事難即趣深月彌暇誰知須
吏間白雲已無罅都失眼中奇茫然獨悲咤

又

孔雀本毒類文章飾其身翠尾列金花鮮麗足移人持
以比百鳥鴟鵂猶為仁出門遇田父相對言語真桑麻
暨粟麥自有事實存但觀田畝間足想二代淳長歌唐
風詩笑入桃花源

又

逐日果何益俱至虞淵隈功能寧足誇戮力與時偕移
山良自苦負土期山顏山若不自移志願終難諧長算
恨日短遠山惜運推有為未足恃超視良可哀古人日
日去後人日日來若復不自閒千載誰當懷

又

花開風自柔谷深日無暉高蘿鳥聲轉葱翠搖陰霏孤
娛有窮深境異心不移東峰虎長嘯西澗麇爭啼運往人

理盡物新古道遠欣然抱竒懷白雲遙相知日夕意猶
緬信有忘歸時

又

雜花生佳樹羣女已出桑村深無秋胡笑語頗相忘著
身入淳俗自然和其光時讀種樹書理近意更長山林
足造化我土不敢荒自蒔一畦菜蒼翠儼成行殺竹插
籬援所以貴周防雖無人我欺深畏牛與羊倘或踐吾
菜前功詎能償雖悔復何益空使寸心傷

又

親友日以疎鄰曲時復至相見晴雨外極論畊種事我
正春酒熟斟酌無次第開園摘綠蔬淡煮有真味相勸
人一生所得在幾醉淺深各盡量但以醉為劑聖人亦
朽骨我輩復何恃共賞此言是更酬到夢寐日斜鳥聲
樂風過花香駛客散冠巾欹我亦歸去睡

又

日日碧山去香草生還踏幽禽識履聲聞鳴故相狎意

行不知遠清嘯得虛峇石上綠雲生岩下紫烟合莫負
今日晴聊折山花插

又

商山非遠遐胡為可避世人間已帝秦紫芝尚周味看
瓜有竒禍紛紛誰能避此翁良優游乃為秦所置獨恨
六籍尊反受陋儒累倘使誠德人羅者誰敢睨蕭散東
陵侯隱約濟南士清風百世存庶激懦夫志

又

我慕陶淵明能怡田畝情日夕飲名酒不知有此生乞
食固非辱在官亦何榮當其高臥時但覺宇宙輕閒靜
性獨樂不以矯激成極陳形影神尤戒無營營雖非晉
宋秋寧計世間名道勝不知物天全妙無聲聊述吾所
慕詎更待吾評

春日書懷

肅肅春陰厚衆花不敢妍似為天所妬故著急雨湔好
醜一時盡園林生綠烟亂雲猶崢嶸端坐自蕭然鶯聲

日景迫柳色春序遷心期諒難語縹緲蘆香傳

又

墻東綠陰好稍覺朝日遲人間事輪囷我枕聊復敲開
扉覽曉色萬端集兩眉風狂忽倒人迎立愛其吹掠我
徑西去花影闕逶迤微吟視青天一笑聊自持相如不
妨慢長康政酒癡

我懷何悄悄彼日何炎炎寸心通來古寂寞捲疎簾聞我一

叢菊青闕映前簷秀色何怡悅更著雨闕添林間此奇事乃

許我輩兼聊持十載意以寓百歲淹神龍安可擾不用固應潛

又

蛙聲池上起竹聲窻外傳吹萬不可息聒我春晝眠林
外固多累林間復多喧誓欲躡太清冥冥不得前以我
一寸心焚香小窻邊以我無盡目送此有盡烟

溪行

悄悄抱孤懷悠悠步芳甸微風動半林細雨濕雙燕高
堂狡獪人一瞬幻千變似嫌俗眼白遮斷遠峰面參差

雙鷺下點破寒溪練立處不近人忽去何所見

李千戶至自南海分遺椰實喜賦

亂餘乏佳實賤者猶貴之招呼黎粟輩已作席珍推豈
無仙人棗無蹤至山蹊桓桓李將軍色映海嶠奇歸馬
馱椰子溲落魏飶垂徇華殼初剖濯濯膾玉肥來餉山
中人意重千金遺香釀缺石髓味腴輕肉芝尊前有南
海頰壓衆果卑向當逋子齡侍親曲江湄啖此不知厭
亦與檳榔宜既別十五年猶有夢徃時故人忽相見喚

起三生悲遇舊心易快感至情還移百年能有此再見
安可期子西憂蜜果東坡嘆荔枝雖云供貢勞吾念君
臣儀安得白玉盤登之白玉墀萬古還綱常不令世愈
衰蒼茫叫虞舜魂繞天南維梅花滿庭淨香烟一簾遲
柳盃更自酌聊欲捐余思

歲晚詠懷四首

陰風入空林玄雲暮平野薄帷負悶寒飛雪鳴古瓦抱
衾不成溫孤懷浩難寫荒荒豺虎區三殤無遺者王風

同列國安得猶存雅黃竹聲久沉傷來泪盈把

其二

前簷立閒夜園中珍木長雪雲正澄澈霜颺復飄揚衆
星憑幽闇各出爭耀芒東方起圓月失此萬點芒不有
照燭功何以尊其光安得騎蟾蜍偃息桂樹傍

其三

天霜不停威寒莖日以槁厲颺竟欲脫未許依藜老南
山多白石終歲常皜皜乃知得至靜超然全所保妄盡

無非天心寧不違道彫落奚作懷鍾山有神草

其四

門扃幽樹聲牕銷羣峰影寒氣迎遙夜華星在西嶺秋
蟲無餘聲時雁有新警天機自消長冥參得深省名衢
萬里輟理海載孤艇力弱昧前馳心強遯真境即俗幸
無能淡然聊自領

城中雨後

何處山中烟移向城陰飛乃知一雨過光景與昨非心

虛納浩蕩神邁得精微勿語馬上郎痴我似我譏鳥雀
十數點空翔若無依城中彈丸多故林應未稀

華蓋山

三山立天半蒼翠橫古今斷崖三萬丈花落紫烟深路
蟠一帶危上薄元氣侵亂霞導飛鳥閒雲護行襟風出
虎豹穴泉壑蛟龍吟川明散衆色空碧生清音仰憩星
河次飛鳥下堦臨肅然剛風近仙人撫瑤琴立身如此
高人世寧不欽蒼茫萬里色浩蕩一寸心期為太清遊

不獨往山林

又

三山白雲合乘我空中行天近通一氣風清來遠聲脩
然臥高寒五曉天雞鳴下臨人世秋縱覽鶴馭輕翩翩
半崖端稍稍千村明餘雲垂衆壑龍鳳紛送迎忽然各
散去放作世間晴日色到遠林輕烟靄靄生亂紅點長
空罽羅已相驚丈夫有高步所異還丹成聖人似堯舜
巢許猶逃名禮華與樂葉俱隨秋樹零紛紛各在眼歎

息難為情

松野即事羅氏園林五首

娛心伏老筇，細數諸峰影。
微烟過前樹，淡日有半嶺。
幽鳥識歸宿，遑恤雲路永。
冥鴻各有見，日邊半行整。
出處無定期，是非諒難省。
歸林忍己夜，夜月變光景。

其二

采采園中菊，青青不堪摘。
沉思何不開，我土槁無液。
汲水聊一溉，誓欲効綿力。
詎能樂安閒，所為造化惜。
少年

莫相猜此意君應識屬聞毀折多使我愈戚戚

其三

山窻一叢蕙修葉吐紫蕤或云斷續花我亦豈敢疑楚
澤多芳草真偽奚難知浮俗尊虛名君子傷令姿博觀
貴自得清芬良在茲枝葉安足辨但令無自欺

其四

兩禪著冠巾園林步逍遙微風所披拂衆樹皆蕩搖悠
然一眺間快甚羣憂銷紫氣涵遠村高霞照青霄薄暮

忽行旅平疇散歸樵亦復掩幽扉夜意終寥寥

其五

閒雲正相聚長風欸散之聚散每如此我懷焉不悲仰
觀何所見所見天離離但當飲名酒寸心始不移醉中
無一事去盡識與知數樹洞庭霜足為歲寒資松栢即
賓客終始無瑕疵

遠離別

空村落葉亂曠野飛雲遲抽盡園客繭難比妾相思自

從出門來足繭坼兆龜夜宿茅簷雜曉行霜露淒仰攀
千重岑俯涉百渡溪骨肉無一在親戚知為誰羣刀血
糝糊殺人相娛嬉有聲不敢吐有淚不敢垂妾魂久已
逝妾身終何之行行忽遇兵擾擾貪獲資力戰豈不勝
何意救蒸黎鄉兵又妄擄無異在賊時朝汲風激面暮
舂日皴肌妾無使令者遠勝妾在茲寄言北去烏妾死
君得知自從結婚姻得備奉盥匱幸甚終所託可保黃
髮期苟死又何憾有此生別離自盡亦非難真君贖妾

歸君心寧絕妄望君君來斯又恐多險艱為妾使君危
怫鬱一寸心撩亂百結絲牽牛與織女乖隔始不疑昨
夜夢到家銀燭照華棖夢覺恍見君回回日如迷果如
兩龍劍長懷想望悲人人儻如妾何以生世為

遊燒香寺於道傍折桂而歸遂賦

欲捐世間憂徑尋林下寺古松工聽法幽鳥靜通慧鐘
撞清國聲臺識先朝事山僮傾茶候道人玩香榼回看
爭奪區始了西來意無生安得滅有患非所致金仙一

何高淡然無可累茫茫曠天劫幽草供深翠出門見東
村孤吹隨風駛前林衆木竒醜薰隱幽桂飄揚滿虛空
狂逐浩無際冥參超欲仙闕玩倏已逝偶聞非售知抱
竒寧立異詎能媚司命深歎招隱士持歸難贈人銅瓶
且勤置

秋日山行雜興四首

獨往非避俗散懷聊尋芳流風淡翠麓理策秋路長蒼
石含幽色樛木落寒香一片太古雲化為孤鳳翔忽然

歸紫霄蕩漾不可望浩歌向夕霽敢事接輿狂

其二

山回杉燦清崖傾花雨下詎知吾道非偶然適曠野磊
落萬隕星赴流飲奔馬風微葉時落磴寒雪自洒孤松
縈蘿轉幽峰抱嵐炮景晦良遇稀心異真賞寡舉手謝
時人巖陰棲古瓦

其三

晚山茁茁開濃秀映秋碧長風瀉萬里寒花落石壁雲

氣靜欲消霞光亂相射縹緲浮丘翁素手垂鶴翼笑看
蓬萊波與世共陳迹天地無恒春羣兒倚少色功名猶
自誤口體乃相賊安知骨為塵不得同瓦礫

其四

運去絕榮念化遷悟妄身舞智巧行殺亦笑榮公貧深
谷無近患寒蘿抱餘春幽娛淡忘歸山水無緇磷風生
禽響發雨歇草色新回眺宇宙間忽覺無一人長嘯斷
崖側悄愴將何親駭機滿歧路踏步安可輕所來為流

泉倚石得細聆激烈蒼龍笛雍容紫鸞笙清輝洒空曲
餘韻盤林高至音含元化抑揚極和平區區理琴絲傾
意俟人聽可憐望知己斷絃復何情

由書堂寺入夫容之麓五代時有胡先生隱居
其地寺故名云今碑不書有游生者寫華嚴
經留寺清整可觀生寧宗時人

雨歇入幽麓朝氣籠淡晴夷途何所慮乃此汭流行大
矯玉虬飛驚波候天明急播萬珠絡遞應千雷轟忽激

羣鷺躍徐肆遊絲縈曲曲揭清淺盤盤度峻嶒明生一
掬綠幽閱兩林清胡為夥生聚却羨非世羸蒼烟出磬
響深谷藏經聲閒過小蘭若茶香滿前楹誰寫天竺書
秋雁點寒汀盛代安可及隅谷有精能嘗聞昔五季胡
君亦豪英讀書向此地詎異千載名俗士輕高人不著
石麗牲空令繞竹泉長作琅琅鳴寸心持餘感出門陟
寒青駭石當目隙高下擁精靈朋聚鳥關伏孤兀蒼虎
撐左峰覆欲壓右崖危將傾乾坤有此險始關性命輕

前邁忽自哂天定亦何驚萬杉列雲際濃淡因雲成佳
椽文翠竹茅屋蟲相憑向來看畫意盡向眼中生老翁
理泉竇東菑秧事興隴謂樂如此翁顰訴其情歷述先
朝美言罷淚縱橫方余起醜羨屬聞意冥冥古來多隱
者全身一何精將非智不及亦豈福難勝不然幽勝地
自可飽芝苓放麈心不忍力極還小停歌吟雜悲樂寫
之蒼石屏他年有知者此語良足徵

白馬篇

冥冥子規林蕭蕭洛陽路白馬誰家兒揚鞭西南去去
去知何為不辭還寧苦陰陽速相禪乾坤幾新故丈夫
慎馳騫闕渚已艱步悠悠獨鳥沒霧暗連村樹

黃塘渡

早聞東吳路今識黃塘灘聊乘舴艋過一篙濟艱難綠
秧映屋秀古木垂村寒曠野何所尊亂躍千平巒回眺
寒烟外浮屠乃上千乾坤我來遲促促寧遑安遙謝山
中人合眼無悲歡

文江夜舟

北斗一何渴下飲空江流南雁知何愁相喚不自休東
浦征人歸孤燈出離幽西淵捕魚急飛火走一舟漢皇
極寬仁今年租稅優有生亦擾擾吾道更悠悠

箬嶺人家

溪田谷深盤石阨水成布風吹岫下雲挂在溪東樹雨
深兩岸花高下樓臺聚安知主為誰倚遍欄干去

又

秋風流平野麥雲抱長洲積塘數株柳高墻閉孤樓生
當宇宙間此劣寧彼優殷勤有雙燕相語知何愁

望玉筍

岸轉蒼石踞長松垂青蘿政當停棹時江入柳陰多斜
暉瀉列岫蕩漾萬金波倚舷一回頭暮氣忽嵯峨羣仙
醒心處許我勤相過洞天無衆竹去去將如何

登北山塔

閒驅葛陂龍急追數峰雨仙人專幽竒我亦微徑取山

花帶雲香徘徊綠承宇身行元氣表心明萬里俯我今
為我役出沒塵潦路仙人何超然應笑我如許何當寄
此山隱几玩今古

東湖別吳伯清周棲雲虞伯生諸君子

炎炎白日長窅窅孤雲去身縻心久歸別至情更苦良
時難驟得異縣不同聚名都親友并並翔文鴛羽處獨
忽多聞至樂欣所遇析理挹清風吟詩看疎雨鳴琴挽
幽聽評帖劣前武有時縱登覽江山見吞吐行襟浦草

青解帶湖柳舞茲遊豈不佳歸來胡遽賦願惟山林姿
終非城市侶故園芙蓉華綠池照茅宇我懷詎能忘寧
為倦羈旅長歌招隱詩諸君果何許他夜宿山郵明月
照去住

寄揭曼碩

急程驚語離知問枉敦良偉子諶多才涼齋每余困冰
收閬浪起雪解河柳潤同行諒佳攜芳草發清眸名都
許當達一官子難遜皇鑒洞淵闕深儲暢閱論達行異

窮誓恒為高賢恨
勗子振清風
余今媿幽鈍

聚遠樓分韻得笛字

彩榜聚遠題登樓記疇昔一尊集七賢
共領諸峯碧雲樹分村容嵐霏長溪色
點點鴉影翻沉沉市聲寂古來多勝踐
談笑不知久欲去重倚闌寥亮滄洲笛

梅

一徑蒼苔深梅龍著花早初回天際春
更覺江南好月色冰霜寒角聲天地老
寄語宋廣平時無蘇味道

題黃壽伯玉泉圖

匡廬三疊竒昔蔽今乍顯美玉倘可求佳泉諒難見朝
暉瓊膏煜夜彩白虹貫比德世所欽含光外非銜源往
豐大川雲升澤九縣在山孰為貴出門敢云賤如何市
朝人為起山林羨

知非堂稿卷一

欽定四庫全書

知非堂稿卷二

元 何中 撰

五言古詩

贈元復初二首

暖雲流青堤光風轉芳甸遠在天一涯幽沉限聞見點
點秋歸鴻翩翩春來燕天路萬里通胡寧絕遐睠竒姿
奪南國悵望愧踈賤良會慟夙心願君畢歡宴

其二

朝采山巔苓莫採澗中藻心同媒豈勞結言不在早深
知各偃蹇非要一時好託輕身易捐百年不速老綠陰
鶯亂啼相攜玩芳草區區幸識察庶得堅所保

春風如少年效程漢翁

春風如少年狂逐無定處垂楊曲江隄細草東郊路
言今似昔不悟新非故流水何時歸殘鶯數聲暮

西湖山

峩峩西湖山靈秀入空碧蘿陰轉累磴松色漬幽石微

霞生絕陁飛溜洒欹壁鶴鳴岩光動花落雲影拆危椒
登古壇百年此一息聲影混大荒不見興滅迹剛風三
天寒元氣萬里色悵望仙子期凝神撫玄極

皈信寺近曾文昭公墓次

綠柘茅舍村青山晚烟渡何處擢歌還直入深林去隔
畎數聲鐘鴉啼翰林墓

程氏山房燕集是麻源第三谷

芳村暖微煦衆岫分餘烟遙迤望遠壑趣得心轉延洞

開石扇仄磻阨淥流喧居人隱古俗香氣通幽禪艷綠
度畫梁語笑相後先飄飄縱飛屐松聲正鏘然窈窕山
曲岬麗構朝霞鮮勲庸在廟廊傑閣諸芸編緬懷康樂
公竒蹤此周旋詎知有今夕聯集玉堂仙羣鵠亦與喜
共舞芳尊前無情尚相感矧當後諸賢暢飲抱真適遠
心寄微言茲遊即千載湛輩期俱傳

招仙觀

逶迤溪南路窅窕招仙谷空堂兩道人殘晷映深竹一

葉響疎籬雙鴉啼高屋出門隨歸人遠燒在山麓

知非堂夜坐

前池荷葉深微涼坐來爽人歸一犬吠月上百蟲響余
非洽隱淪隙地成偃仰林端斗柄斜撫心獨悽愴

遊樂安穆山寺

秋陰出南郭佳色來遠山悠然渡野水却宿前林間朝
氣銳幽步相攜上孱顏行穿綠蘿遠共愛青杉閒已窮
高原路忽得雙石闕飛烟帶香氣深木藏幽澗景晏鐘

磬寂桂花滿苔斑道人一尊酒時聽風珊珊多悟從此
始塵緣諒能刪空廊對微雨亦復不知還

宿田家

村暗烟火生林深雞犬靜麥花如積雪月色淡相映鄰
家夜汲歸寒蟲滿幽徑

發新淦金水亭

振衣上野航回首謝山陔日淡秋水空風清片帆遠沙
光侵岸發峰影隨人轉前渡烟火深離亭路今緬

小孤山

牽牛與織女河漢有時渡
小姑綠髮深隔與彭郎語
流水去仍回望郎郎不來
精神有相貫形跡難相猜
年華朝又暮江頭晴又雨
靈風吹斷磯行人聽鐘鼓

曉發辭夫磯時李河漑之友先行

荻暗雞鳴村平皋下殘月
參差鄰舫語櫓聲帶潮發
露華望中白蓬陰散秋髮
沙鳥知曙鳴海雲上空滅
念我前行友青山已飛越
遲爾及相攜無嗟賞心歇

龍潭阻風夜興

水宿滯前期前津北風惡林寒燈影深
莎雞滿籬落荒忽寄孤迥淒清愧離索
年光星河轉夜氣衣裘覺我前
勁翩翩我後大魚躍潮痕侵柳根
移船避沙閣

淮陰古城

牛羊上荒城茅葭深樵路鐘室嘆良弓
此有韓王墓徇名本何成
早被鄭侯誤聞尋舊釣磯
杳渺蒼波暮

望新安山投宿不及

踰淮數百里欣逢下邳山新安十數峰窈窕霞影間遙
看若可即既近杳難攀契深迹莫遂悵然空厚顏倦鷺
辨沙落遠禽求村還已暮將何歸田濤冒溲灣渡口雙
古柳茅茨相與環清時寄孤枕敢厭聞驚潺

歌風臺

神魚驚遠海雄鵠陵高玄區區一亭長帝業何赫然光
芒三尺劔羣雄讓鋒先羸項屹山岳掃滅如飛烟故鄉
偶一歸父老相周旋百感忽中起深情何由宣往時同

功人今乃不一全害能亦寧忍遠計有未便矜覬視孤
影三侯發尊前丈夫英雄氣兒女淡迸泉縱觀能幾時
憂虞浩無邊西風吹古臺老屋歌河壩低徊一長嘯乾
坤多材賢

登李白酒樓

當時謫仙人四海蜚英聲偶然此一醉遂有無窮名叔
世尊放曠中度翻為輕頽波浩難返憂思誰能平

同鄉客

遙見江西船認是同鄉客何日發龍興迎人問消息長
河落雁秋古渡啼鴉夕不見楚天長重重暮雲色

影兒灣看落日

玄識超象外精聞洞心知諒非耳目及難用尋常疑杳
杳大荒濶紫毫散天西垂輪忽漸側綠水浮金龜昔我
事畊釣巖溪恣愚癡秋風影兒灣夕景無前竒六竒孰
云廣余行亦非迷揮弦訪太容鍊石尋安期

酬揭曼碩重贈

卷二
歲晏君獨留路長我將發林居難共語帝里易成別煮
水逐人飯依樹因車歇今夜抱衾眠街頭響鐘絕

宿十里村

朝出順承門暮宿十里村臂鷹獵騎歸積雪明郊原居
人喜客來汲井鄰墻溫羹湯稍暖熟餅餌亦燒燔此夕
羈旅意深知路人恩重林隱城堞昉此勞心魂

涿州道間雪霽

昨日飯良鄉今夕涿州城此路有終去安能緩車聲平

野散寒景流輝起浮英濛烘遠樹密落削僵柳明猶律
共鴉牧團瓢忽雞鳴殊方雪初霽余抱孤賞情胡爾同
車人苦云路難行

河間曉行

歸人心久歸車夫苦相促衣裳急披攬衾毯自裝束寒
深肌骨痛夜久情懷獨萬里多往還他人媚僮僕霜枝
叫羸雀雪徑過山鹿望墅欣海霞辨烟識村屋飢尋麥
粉麩到夕當得粥南中好男兒閉廬絕行躅河間堠子多

毋煩記生熟

早發東阿午經東平晚宿汶上是日雪

嚴裝齊地曉授館魯鄉暮天寒客心速雪下車聲去迷
獸出桑畦流人披野路淺靄須城山斜橋汶津樹前聖
有遺業恂恂經行處荷蓀與耦耕何其得深趣

淮安道中

鐘聲起前林悠悠向南客天垂大野高月淡行路白鷄
犬淮上村雲霞海邊色舊時塞垣地來往人馳驛

得風自施團一日至梅根

泝游縮程期景氣異昏旦波聲船頭響旗尾檣竿轉施
團方入望忽過繁昌縣雄吹徹齋冥陰色形怪變凌
虛曠超軼坤六酣龍戰幾日西南風去帆眼中羨蒼蒼
水雲鄉九華今不見

南浦旅懷

鄉近歲已闌猶為候風客落囊蓋蓬深三日不知息浦
樹分城烟水明遠沙色滿篁紅竹枝渡人隔村夕久滯

妻孥望孤還友朋惜音形兩睽離情生自難抑

朱方偶作

雪餘春水生日上暖雲泮杳靄松林中柴扉起樵爨新
粒攜童稚鄰曲欣年換坎坎村鼓鳴沙頭酒聲亂江西
田家樂豐歲猶盛觀山市溪橋春還多看燈伴

訪程漢翁不遇賦寄

高躅冷冥棲鈍資得睽阻逢人問來期指日往城府俄
聞幽軫至迎候急江滸沙柳歸流風陰虹割飛雨還同

騎馬客尋竹叩深戶多蘊喜頓傾失覲還如苦度鳥遺
還聲緘情促歸武怡悵新城雲秋山事晴嫵幸因揭陽
侯謂曼碩也日日問玄悟

酬彭通復懷友見及之作

疇昔到沙步芳時感嚶鳴日華起闕采林香散樹英虛

館許行李輕闕下鍾陵還期念當遠枉矚欣欲驚新句

出良斲慵疎媿專精天質謝人飾狀妍終莫能程凡守

丘壑揭弟闕神京出處各乖濶能不勞深情蹇劣忝相

厚如何歸思縈溪人尚貞素迷復懸清評

暮行城東懷程漢翁因寄

倚郭起遙悲日下滄波闊何處是新城層峰翰飛滅始
及今悔誤沉想還成結百里詭稱遙長年忍為別回風
歸山霞道景發沙月獨殷今夕情淒迷轉城闕

丹霞洞天

飛鳥落丹霞蒼然洞天劃草木皆異香烟霏有靈色寒
苔潔宜坐幽水甘可滌樵子指峯賞野翁教樂摘琳宮積

筠陰慮消景難晷道人供仙茗疊疊古所歷唐王懸舊
照唐帖式遺墨使年知幾何山前事多易稽首浮丘翁
歸與紫玄宅

照武西塔山報恩寺

山椒敞禪扃幽欣失微倦密林稍深沉新笋亦葱蒨磴
折迎空香臺虛得清嘒芸芸趨前塵往往遺勝踐始知
佛力弘能使地靈見市聲俯一席山色照三面郡小覽
易窮興高賞難徧微生諒何緣周流散遐睎

浴侯官湯泉

天氣稍清穆，聲洎荒津湯。泉洌山半取，徑娛幽淪解。
帶散疎髮培，漪澡閒身暢。然肢體舒洒，若襟懷新。其下
多嘉樹，細花落繽紛。和風來樹間，芳氣通微辛。繁陰屢
移席，俄令鳴鳥親。無為急行返，殷勤謝舟人。

三仙謠

紅紗籠玉香，金翠綉鴛小。鶴頂壓青絲，斜戴花枝裊。何
方馬上郎，下馬佯驚悄。羅扇掩微頰，答語相縈繚。郎有

千金重妾惜容華少怕不稱郎心看郎幾曾老

苦熱得雨

炎德王甌駱羈羸負天刑不為水谷留乃使熱阪經几
席集蠅蚋輿臺亂猿鼯居煩易激疾習靜難遺形每倚
高閣立但愛方山青林端動虛籟殿角搖飛霆雨影襲
虹氣土香襟龍腥脩脩改神慮肅肅賓仙靈散襟淡幽
佇稻花如雪馨

九日

屬耳喧令序虛旻景清溫久生理難期陽德聖所尊菊
籬黃未拆萸枝綠初繁時萸尚青幽岵寡芳物離索誰相存
白日照杯酒壺山落秋痕高歌行太清海翳開渾渾倚
伏祥視履登高倦躋攀化機何由息悠哉委乾坤

壺山絕頂望海

縈磴入蒼靄斷崖倚晴暎天颶盪闕駛蜃氣迴矚昏曙
石偃危椒谷王浩無垠鳴交羣龍戰舶點微鷗翻浮雲
岌雲朶懸霄浴霞根空浴東南突迨闕日月門指數十

洲翳招呼九仙存
余懷已濔濔前境方
渾渾乘槎寄虛
感微迹猶當論

登九仙山

仙何姓兄弟九人

吾宗九仙人鍊藥此山上
渺渺嘉遯心乘烟一相訪
海門葱蘢外山氣嵒嶮狀
側目明遠潮歸霞委孤嶂
塵緣誤良契仙事敦夙尚
何處乘鯉歸微風起清漾

烏石山天王寺

天王小精廬山角臨城闈
古稱藩服雄異境環相陳
塔

影六七枝瓦縫千萬鱗烟明南臺樹潮壯方山津老僧
肯前揖似余異人人指點壁間畫修廡行逡巡觀音大
士在維摩妙悲顰蒼然古木陰寒山皆可親板扉幾尊
者一一皆風神老僧太息言劫餘偶遺珍從今幾年算
此壁終成塵余笑謂老僧子意亦良勤適見俄已失當
悟無還真

黃溪口看白水

黃溪且緩程白水方迎賞石扇千餘仞雪源數百丈幽

光照天動寒氣發地爽松杉含清英猿鳥玩竒響仰視
葱蔚中當得一席敞移家結香茅抱書寄泉上

訪貢仲章舟行阻風

今旦始自信余生非數竒懷人發清興欲雪成良時波
響雙櫓溢灘寬衆帆馳危查立小渡殘竹懸斷旗指浦
見鴉合轉蓬惜峰移深烟曲江磬微雨三洲炊寂闌有
餘適濛鴻無定姿余寧不可奈久與西山期

送人歸臨川

雖云有朋友音素猶難之奕奕大藩地遽得歡會時飛
雲散寒威勝賞應前期高樓酒深注簡畧窮談諧但感
人似雪頃刻合有離何當雪如雲恒見堪相追雁下浦
含暝川寒人去遲年華委分首誰能計推移

雪中重過黃沙

環環磴屢折剡剡峰爭迴木陰與石澗梅花抱泉開長
思黃沙好每待春雪來陽和發坤厚寒雲失貞材引雲
賈余勇陰飈行新媒垂成一川雪步步當徘徊杉竹懸

明水踞瓊遞清哀叢石動溪響叫吭出林隈含欣耦孤
關
迎賞利蒼苔夙昔多親友茲焉起余懷

早起

覺來日已升花梢衆禽語何許白浮萍池間散還聚起
見梅已空夜來幾更雨魚行春到水草暖香在露溪上
人語喧樵薪滿沙路

撫州魏壇觀

何年女仙壇百步遠城堞樹色隨春新飛花襲枯葉廊

虛苔綠重簾靜藥香泱主人勉逢迎小總薄茗呷却讀
魯公碑仙事公素愜是時中興頌筆力泰華壓此書最
為小勁氣亦業業大節照古今片石即光暉人生果何
為草草度塵劫揮手謝壇扉天長碧雲疊

鍾陵紫極宮寫韻軒晚立

擇勝委清矚空軒橫晚晴遙屏散脉縷毫髮分昏明沙
鳥雙復隻林烟濁還清蒼旻貯止水白雲載舟行接要
居郡最翫奇盡天成當時寫韻人此寄千古情招之不

可得暮磬長廊聲

洪都靈應觀榜雲徑

厭煩取蕭閒隨意入雲徑上堂敲響板山童質辭令地
寂室生涼體暢心逾靜出門看木陰佳鳴發清聽風光
勻可愛水色艷相映真契成自怡歸路得新詠城市今
滯留將無失幽性

新淦太平山

縱觀不知遠言登太平山諸峰卷秋雨日射風霏間懸

磴折古石側溪倒危潺金燈如丹紅異藹相爛斑忽悵
經丘絕俄欣尋壑閒筠陰聚森爽樵人指幽關鐘聲出
晝靄演梵作孱顏靜者足吾契語瑩水珊珊崖東野月
上露華膏夜鬢松炯玲瓏流颺過瑤環既靜有餘聽
焉知趺坐頑偶然在塵表非能悟無還

崇仁鍾山寺

宋樂史侍郎
有詩在寺

方看望仙雪仍訪鍾山泉石隈危溜峽崖減青天不
知路深淺但愛山蒼圓俄驚侈樓觀一禮黃金仙衲僧

喜客來觴行續茶煎仰視慈竹題俯吟慈竹篇前修凜
高躅滋久餘芳傳白日倚山轉倒暈千峯烟悠悠思難
極且與樵風還

樵溪

林嶺甚可愛溪源無盡時山花已亂發烟暖東風遲因
與採樵者坐談樹陰移日斜自歸緩我興非人知

立秋日雨

律候秋序改午陰玄雲飛驚霆發碓殷甘酒行空霏迸

響下清鐫漱花裂明璣餘涼泛匡床薄潤通練衣草木
轉異色山川起榮輝弘敷三儀德燕及浮生微棊几亂
書帙撫之有餘款聖言角相說人理還多違山田秀加
穎歸息期林扉

壬戌夏五及陳宗元會于富州下橫黃氏

蕙樓罷看雨稚綠新成陰流風淡欲留泠泠山鶯吟美

景天氣和

闕

臨情真語易契趣遠領

闕

深上客

賢主人蒲香酒頻斟交歡不知醉詎計西日沉談笑偶

一時流傳成古今母為略斯集異世當追尋

河口市岐山觀與友人皮季武同遊

旦旦望岐山樛木森山椒其下美清蔭仙真集蕭寥佳
友謝塵慮導余度飛橋危漉濺跳雪石磴巖靈颺探遠
裂凝陰凭顛洞遐霄寒蒼貫晴紫滉瀟峰壑掄久無登
臨適快此煩塵消日馭諒難迅人區亦非遙遲遲敢述
復疊疊同歡謔

豐城疎山寺

天氣良晏溫山原足游行石溪試初涉衣裳費牽挽油
油風力舒恍恍煙色遠指峯左右賞愛草行坐軟情興
俱笑談造詣各深淺望望蒼寒中禪闕路猶緬

樟樹鎮五公寺

久幽厭拘維暫弛欣舒散近闕得禪扉擇步歷蒼蘚沉
沉松陰重艷灑水光遠殘花起餘香乳禽響新嘒虛廊
清晝長高僧坐談簡學室素所昧慮妄還自遣移晷始
知歸生烟滿林晚

清江鎮靈峰寺員嶠亭

拔迹竄塵區置身清涼境深深蒼松林炎曦不通影松
根得散坐肅然心自醒閒草膏以綠新蟬咽而警元非
造幽邃已足移視聽何當真物外無慙虛與靜

重到山水村

往時山水村曾駐老仙策俄然二十暑重到高陽宅著
書邁前聞析理發新益盛集天為成高情世難識繫余
最疵謬每幸親講席怡悵俯仰間均能髮鬚白山沈空

外青川停雨餘碧樞章懸舊陰蓮蕩起生色上客詎可
期佳時諒難得疊疊後來人遐追撫行迹

送涂雲章北遊

奇璞閎偉器喬林長珍材國工久寂寞甘伏巖壑隈清
廟九筵煥明堂八牕開良時難再得振衣起蒿萊流風
寫空江迴舟越清淮直上到薊門故人與談諧所來非
迷方咸罄奏天階燕昭稱誼辟樂毅名高才區區寧足
道鄙劇何為哉六龍正御天走奔風雨雷奚待一孔薦

自宜四夔偕素抱飾王度聲光遊江垓古來致身者不
為雲山懷珍重闕
垂芳在深培尚令王子困善頌
端能裁

病起舒懷

常時不知老衰病遽見侵入喉飯若仇毒腸藥難禁始
終理夙徹羈旅情自深朋友各相念撫憐出真忱踰旬
幸能起四體危嶽嶽幽舒雨新寄綠光傾遠林疎籬上
孤蝶石笋跳雙禽油油好風來迎之散衣襟欣然若可

飲清爽空煩心平生事聖學學定詎能任惟應委此身
天壤俱浮沉

閣皂山鳴水臺

兩山阨一峽幾大落寒水蜀灘春濤壯吳江夜潮起靜
聽得天韻冥參洞玄理遽得還未能淹回成自喜幸茲
有臺亭綠蔭極清美霏霏林香生郁郁山光委本非塵
土胸偶此一流憩所聞盡心聞我耳毋煩洗

持志堂蒼玉軒

仙家葛源上空涼，故崇軒肅肅嘉蔭靜。泠泠清韻傳軒
中有高人讀書事，丹鉛尚友惟此君。恍若物外仙，猶名
乃蒸貴比德，豈莫言乎尹。自旁達溫潤而栗然粹質生，
不瑕直節久彌堅。風烟與雨雪萬變俱，盛妍偉哉干霄
志。孫枝益綿綿，尚令後來者毋忘淇澳篇。

李氏淡香亭

清冷一渠水，窈窕五畝園。相攜步荒徑，左右花藥蕃。好
風颯而至，語笑興彌敦。勝日得佳景，占星詎虛言。散憩

一小亭繚以衆菊根歲寒淡香趣深奇難具論盛年值
明世奇翮當高騫秋容與晚節豫訂此道存林氣漾華
艷珍材美瓊璫今夕果何夕殷勤屬芳樽

劉崇正秀才金伯修高士自閩臯山來訪余樟
樹鎮值大雪時余抱病病愈賦別

雲凝雨不靈風定霰未先茸茸數素塵轉轉遊輕鈿萬
花開闕寂千林耀春妍景麗佳興發二妙來高軒旅館
共清坐雙壁暎談玄余衰得奇疾藥鼎煩烹煎明明桑

興義尚反千載前念昔戴安道可以與之言胡為王子
猷竟返中夜船雪罷洗峰岫歸情勝剡川寄謝山中人
丹訣期相傳

儒學提舉司宴集

賤子久在野低頭事躬畊堂堂賢宰輔胡為知姓名許
辭庠序責復假賓師稱仰既慚簡書俯仍媿輿評公館
良宴會文雅有餘清粲粲珠玉質嗷嗷鸞鳳聲深意修
綆汲雄辨四筵驚我衰但多感一出寧非輕白日照天

碧耿耿梅花明城南有歸路西山能送迎

除日文江書懷

馳外心久息求安志恒違江受風雪歷帆從波浪飛
眇彼東山雲妄行已是非為誰餒殘臘蕩漾不知歸
沉沉州郭暝黯黯烟火稀流坎理多悟孤暎情自微

寄題天光雲影樓

城南有高樓樓高莫與儕上接銀河流下臨寶鑑開玲瓏
八牕境洞徹萬里懷至人泰宇定靈根固深培不假

日月輝長照神明臺
射屹不動幻翳要難裁
初萌朝菌幽轉作冥鴻
來須臾忽變滅炯炯無纖埃
冥叅足多悟內定外自諧
倚欄視下方此心良悠哉



知非堂稿卷二

欽定四庫全書

集部
知非堂稿卷三
四

詳校官中書臣孫衡

侍讀臣孫球覆勘

總校官原任中允臣王燕緒

校對官中書臣吳俊

謄錄監生臣董邦本

欽定四庫全書

知非堂稿卷三

元何中撰

五言律詩

述懷

文藻風流盡天機
定偶然自憐有今日
猶復望他年
道遠雲十里樓危雪滿川
春還有消息好去到梅邊

除夕

厯象羲和遠誰將舊恨新
燈前數杯酒宇內幾閒人
豪

傑悲來闕江山識故春
今宵分兩歲看劍不妨頻

正月五日吾族諸老儒服縱遊

縱遊二十士遠賞物華新
好是小蘭若一來中聖人
桃源在何處流水不勝春
歸路狂歌甚敲敲烏角巾

又

山中忘世換人事又從新
儒服吾宗老南冠故國人
悲風千載淚幽谷一年春
折取山花供清香已滿巾

又

有計能興漢無辭可美新
才名歸後輩事業見前人
野水孤村暮梅花萬里春
斜川同日月漉酒正須巾

幽尋

意適可幽尋天空曉氣沉
鷗飛一川迥花落五雲深
庾子江南恨瓊奴柱下吟
野風吹我老鴻雁有餘音

晚興

雁背霜花落吟悲興自如
天虛鱗甲動山老鬢毛疎
斷隴暮歸客寒溪人自漁
蒼茫閉籠落正爾緩羊車

遺老

遺老今猶在方知有亂離為言前宋事曾見理宗時
邑遠何年到身臞獨步危已無桃可種力穡賴諸兒

春郊

湖海獨垂釣風雲入短蓑燕來春已去花少雨偏多
一飲捐愁却千盃奏醉何青山如有意對我獨高歌

又

試數亂離年傷情更惘然牛羊荒草樹天地老風烟白

骨蒼苔外山花野水邊
幽禽未棲宿來往自翩翩

又

歸鳥情方遠啼鶻泪未收
淵明姑託醉老杜不勝愁
雲冷花無主山寒雨似秋
江南春水足何處具扁舟

雨後晚行

太虛萬籟動獨臥一畝陰
雨足歸雲遠溪流到海深
古今同此意天地一何心
我興聊復爾露花沾我襟

又

漫適閒中意應知事外情江山歸釣影天地入笳聲小
市風烟合孤村竹樹清眼中賒小景收拾即詩成

又

樓鳥黃昏後歸牛蒼莽間水明疑有月烟淡欲無山幽
谷元非隱高人自喜閒徘徊不能去莎碧耿荒灣

伯父堅白道人輓詞

畫靜清江獄

臨江錄
事叅軍

春調衣錦絃

知興
國縣

去妖人共異息

盜史堪傳使節臨鄉國郎星照楚天穆陵親擢士公不

愧諸賢

又

栗里陶元亮南陽葛武侯事功今代見壯志古人求短
履漫岡晚深衣老圃秋公心無可遡遽往帝鄉遊

又

我亦公猶子公寧忍棄吾恍疑容色在還聽語音無風
急鷓鴣冷天清雁影孤九京良感激慟哭洒寒蕪

老圃堂雨

臯某不可復懷哉步蒺藜江山宜有史風雨可無詩漢
殿金人別唐陵石馬馳物情猶若此公意竟誰知

又

深谷紫芝曲南山白石歌斯人嗟已矣此恨果如何扇
裏薰風在花間暮雨多悲吟聲已苦一鳥下庭柯

喜雨

雲葉來西北風聲乍疾徐冥冥天下雨湛湛圃中蔬書
傳堪經世乾坤且負鋤欲言無與領獨立看芙渠

雪

共喜輕堪玩寧知積更明陰凝兩儀合勢壓九州平
江海漁蓑樂山林茗椀清何嘗不奇絕誰望一朝晴

奇石

奇石爭迎立青杉互引前冷冷兩溪水淡淡一峰烟
閒作題品字時逢採藥仙蒼崖恐陡絕松影一颯然

山中

何處征徭急茲山水石奇鳥鳴新葉長磴轉斷雲移
趺

坐天正碧起行風自遲徑穿松罅去巾袂冒蛛絲

微雪

微雪寒烟淡遠村喬木平年登猶有殍政猛更聞兵亂
水投陂急羣峯照野明酒盃無限興詩句有餘情

別羅士鼎

晚煙寒雁度夜月遠鐘微高韻非今世清評閉野扉始
知千載上未與寸心違落葉荒山路獨憐身是歸

送喻道人歸蜀鶴鳴山

社主猶無國西枝更有家
早貪吳景媚今恨蜀程賒
山豈東南異仙寧遠邇
差鶴鳴更須到方足養丹砂

又

緣重身真患時移事盡非
遽廬誰是住華表底堪歸
卸路雪霜苦錦江消息稀
天長翅翎短休傍暮雲飛

曉晴

一雨生春色千山起
曉晴落花縈樹轉幽鳥過林鳴
杳杳
杳天如古茫茫世有兵
開扉小倚杖沙上草初生

南居寺

閉戶未從容出門誰適從聊隨碧溪轉忽與白鷗逢小
雨十數點淡烟三四峯峰峯看不足山寺已鳴鐘

饒州道上

新晴破積陰淑氣泛行襟千里山河眼百年耆舊心霞
飛滄海遠烟入綠村深學劍江東者茫茫不可尋

又

手舂初歇杵麥粥午香知白酒村村薄青山處處竒天

垂雙鶴遠江渡一舟遲
楓合東吳綠何人續楚辭

采山歸步

松邊採藥去谷裏帶雲歸
步轉半崖側影涵空澗微
獨尋茅宇歇因看水舂機
數點山花落孤禽避客飛

象牙潭遇風

圓蓋吹應側東溟倒欲乾
數帆將雨急萬燕逆烟搏
缺淚經頻拭低昂儘自安
還將長嘯處雙槳破空寒

病中感懷

多病他鄉外，孤懷始覺愁。
山園雙鷺曉，門閉一蟬秋。
遇合馮生缺，勲名季子裘。
悠悠耦耕者，端暇為人謀。

夢鄒明遠時遇金溪楊方

心達形空滯，神交夢自歸。
江山真有待，時命且相違。
君母虵杯悟，吾親鶴髮稀。
殊方今夜雨，偏向小窻飛。

留金溪夜雨達旦有懷

忽見干戈動，他鄉隔老親。
一牕如此雨，兩地未歸人。
雁渡關山暗，鷄催海宇晨。
誰能更鼓枕，聊挹曙光新。

陳家源

恐是仙源裏山從洞口開茅簷無客到稚子恠人來塘
綠魚迎日林清雀啄苔欲令幽賞足石道泝縈迴

又

翠霧斷崖側丹霞流水西竹從幽處密松自古來敲落
葉半藏路清風時滿溪仙家元不遠未許衆人知

龍池寺蒲石

底有貪竒意吾行亦偶然尋泉經絕壑看石到幽禪鳥

語前林日雞聲曲巷烟偶逢樵客歇
共生偃松邊

留文江久雨值水

半世長為客却悲行旅艱
相知惟有雨四望更無山
命寄浮沉裏心遺生死間
丈夫要經涉可復事安閒

白鷺洲

淡淡薰風度江明天影開
竹陰侵水碧草色近人來
諸老心猶在十年首獨回
非無李供奉却少鳳凰臺

甘詠之輓詞

經傳明精義圖書貫大全曾為諸老敬不受眾人憐風
雅力還古林泉清欲仙南州餘此士北客識高賢

又

花嶼風醒酒琳宮日度棋高談千載靡浮俗萬端疑柳
暗西湖路梅殘東閣枝篇章須爛漫知復寄從誰

又

獨鶴城闌語聲蜚到竹林安知名一世不忍負初心良
晤情方切幽居病已深俄然隔千古慙恨淚盈襟

劉太博輓詞

懇款憂危國從容友大臣竟孤嬰白志遂作綺園身名
節非無壽乾坤更有人堂堂天下士何必畫麒麟

又

妙悟通羣聖微言判六經千年遺此老四海失先生文
字空傳迹知聞漫敬名豈無房杜者猶足致隆平

又

如許龍門近胡寧忍澗疎不為終古別詎信此生虛未

始壺丘學頗知揚子書向來香一瓣薄命竟何如

程揆管挽詞

行意心追古材高道即師澤深三族浹庇遠萬間資蒼
隼須秋擊甘霖入望遲東南此人物天意遺明時

又

偶奉親從養因令季保城詎知求偉績不忍毒蒼生厚
祿君恩重浮雲世事輕脩然拂塵服身退更為榮

又

雨露深喬木乾坤啟德門勲名雖盡幻施報始堪論四海天球在他年上蔡蕃門人更須慟奕奕久彌存

寄鄒明遠就問訊諸友

宴坐列芳植鶯聲春雨餘空齋三夜夢遠道一封書能事身增病窮居計未疎諸賢日相樂我獨問何如

聶氏丈人室

八尺床敷愜清平許客過堪容四翁隱頗覺七賢多山逼陰留席池藏水禁波此中惟可飲新釀近如何

送曾教諭之官萬安

今雨深春色江花映餞樽
近看斜照下轉覺校官尊
山色通講席灘聲到縣門
金閨須布武六學始堪論

立秋夕作

但覺焦原苦何當沛澤流
夕風微報響古木暗藏秋
未事冥難測閒心遠作愁
亂山高下碧烟靄淡浮浮

雨餘桂花盛開

搔首發清磬開扉啼早鴉
西風一夜雨丹桂滿林花
老

託心猶壯愚云識有加平生讀書眼閒送曉天霞

次吳仲谷離字韻

一闕

聊信意相遇若相期賤子方成喜先生便語離梅
花迎客發山色待人知從此圖經裏應添所賦詩

送巡檢之官柳州

轉覺為官易皇仁貫地維更無方域限寧有徼巡時丹
荔柳侯廟紫苔韓子碑弓刀多暇日煩為拂蛛絲

陳母姜氏輓歌

閨閫芳猷著鄉閭盛德尊早為三鳳母晚托八龍孫世
有金鑿美人誰琬琰存堂堂韓吏部銘碣照高原

槎溪

岸斷風敲柳村寒雨病花安心貪自適危路得長嗟別
壑亂雲散危灘歸鷺斜平生謝康樂幽意滿天涯

元真寺橋小憩

古剎傳清楚橫橋雨歇時年華流水在春事落花知宇
宙遺陳跡江山本後期向來多薄命今日信枯藜

送人歸臨川

金河疎柳外去櫂響流漸為客有歸日送人愁別時寒
雲隨雁遠南雪到山遲舊隱書無恙行藏莫豫期

絕江

掛席亂驚湍曾過此渡難潮歸揚子晚山入秣陵寒聽
語知鄉近忘年計日寬穩行隨夜泊烟火滿江干

登峨眉亭

蒼壁孤亭立彫年獨上時帆歸空渚早雁落信潮遲烟

火聯三郡波瀾動兩眉袁宏成絕響李白厭諛辭

鄱陽湖中除夕

除夕生能幾誰無骨肉親望鄉偏恨路在遠并遺身湖
雪殘波岸船燈獨夜人淹旬須一到珍重故園春

行樂

行樂當幽賞晴峯帶雪敬水香梅落處沙潤草生時事
識心仍累身添疾畀衰深村紅葉路樵牧轉相知

辛亥元夕

頑坐故貪默忽行時自言寒沙梅影路微雪酒香村時
序鬢髮改人家童稚喧街頭試燈候不到郭西門

送吳主簿之官石埭

簿領池州去開帆帶雨微當令公事簡見說縣人稀雲
入九華碧雁驚秋浦飛丁寧橋下水官滿載書歸

贈李仲元

曾逢偏意悟顏面費追思把酒忽相語計年深自悲亂
山藏路遠秋水去城遲若到寒溪上教兒護菊籬

別唐仲謙

記名長似識相見始慚非
每到極言罷却欣幽聽
稀日明山氣改江靜水痕歸
漆得今朝別城陰空掩扉

水口夜思

牢落不成寐荔陰寒石磯
潮生灘響盡海近夜涼歸
旅思隨時進鄉音逐遞非
燕南與粵北恰是費征衣

山墅幽居好效穆伯長

山墅幽居好烟霞紫翠鄉
近窻皆水色通屋盡花香
報

曙啼鶯慧驚春乳燕忙不須頻諦視淡艷小林塘

其二

山墅幽居好陰霏長綠蘿地藏禽響異門掩草香多曉
日明媒雉晴峰對牧鵝有時隨野豎吹笛小船坡

其三

山墅幽居好隨人事事宜祝雞行蟻盡乳犬穴蛇移瓶
瀋佳泉煮厨烟落葉炊藤香和棘刺扶補便成籬

其四

山墅幽居好清闕託靜深
鑪薰太古意方冊聖人心霄
漢詩情到秋毫字法尋開
簾散疎嬾燒燼落花陰

其五

山墅幽居好花時不惜情
前身曾作蝶有夢亦隨鶯
艷得渾無格移來不計程
每煩人客到指點問何名

其六

山墅幽居好工持結夏規
靜扶楓本釣沉算竹根基
原本

闕

其七

山墅幽居好農談到夜分側林斜淡月遙石長幽雲鄰
屋燈明盡磚爐酒氣聞兒童催就枕露點落紛紛

其八

山墅幽居好秋苔席月明伏龍扶甲影飛鶴發毛英河
漢清丹極星辰淡玉衡殘荷兩三畝時聽籟飛聲

其九

山墅幽居好加籩不外將帽紗梨谷露衣氎橘林霜醒

妙疑仙教蔬珍共婦嘗一竿元放手風席碧灘長

其十

山墅幽居好瓶儲歲計終問梅經古剎看雪到危峰
鯽穴寒漁雋麇溪曉獵蹤速隣相勞苦行閣炭香濃

讀晦菴集

劫重魔偏勝言高俗每疑屈伸應有待真偽竟難知
燒燭成花處看書徹卷時嫩涼秋蒲院蟲響起前墀

吳仲谷來喜雨

山居難適俗到縣動經年偶出成竒絕相看各粲然酒
深孤菊外燈淡小樓偏草草荀陳事他時倘有傳

贈盱江黃季與往宜春訪舊識孔知事

此地忽相見驚心十載期未詢行處事先說別時詩小
市見人喜北風征帆馳如何不暫駐總是舊相知

牡丹

異錦呈孫巧竒雲夢女神珊瑚離鐵網翡翠糝金塵天
上花難並仙家畫莫親如何元化力獨釀一根春

除夕

我有百除夕，遠廬是處安。
翻因歸路近，始覺到家難。
浦隔雁聲落，蓬孤燈影寒。
家人應共說，賓閣尚盤桓。

五言排律

節婦周母鍾氏挽詞

毓德推閨秀，來嬪盛壺彛。
詩成自誓日，孝盡立孤時。
被教三遷早，娛親一檄遲。
里門人共式，汗簡史應垂。
燕喜高年集，情深愛日馳。
丹沙蓬海淺，絳節婺星移。
松栢闕

龍近風烟過雁悲區區劉子政僅就挽人詞

陳峭軒挽詞

良璞未有識需時為席珍淺滄海地齊汨呂梁津桂
楫以前溺闕枰入至神千金何瀆魯六印不酬秦瑤圃
花光曙麟洲酒影春青鞋天地闊細帙古今陳遇物聊
施愛於情每以真百年椿嶽屺四世玉嶙峋盛德誰與
讓能言寫未親仲弓今已矣碑版屬何人

陳提舉輓歌

虞日來儀鳳周郊早畜麟方推王式化已客馬周身事
合符休運才猷接近臣東朝深雨露北極上星辰倬直
宮闈密官箴簿領勤劓繁蘇劇縣決訟讐豪民餘事脩
班序高名動搢紳奉徵資莞庫蒙冶剌輸銀計日堪經
國知年急養親纔酌三釜志遽造九京人陳寔家聲在
吳兢史筆新徵銘宜狀實痛誅最情真秋雨昏山色寒
烟黯路塵蒼茫幽竈處哀挽競傷神

梅

竒植遺山澤，英姿照古今。
醴薰貫三極，貝色表千林。
年運神孤王，陰凝力獨任。
太清涵妙影，元氣託芳心。
薄雪村村淡，輕烟澗澗陰。
蒼茫何見晚，邂逅卻愁深。
南紀開春事，幽情寄碧岑。
自憐餘短策，相對發孤斟。

移菊

僅得林間趣，閒尋菊本移。
人家深竹裏，楓葉夕陽時。
汲井澆畦潤，將鋤下手遲。
護叢愁蓋損，帶土怕根知。
每被歸樵問，深憐冷燒隨。
寒香生徑術，幽事補灣碕。
斗柄西

北落雁聲霜露垂
回繞叢畔自笑可能癡

寄程永旨

元凱同巖名

闕

班錫異恩聖神思治切宗社有公存地

立鰲峰峻天依鳳闕尊臯夔侔道合旦奭共心論

闕

幹

時雍化丕揚祖烈敦堯文嚴大典虞采倚昌言卦氣丹
凝鼎星符紫照垣奇齡歸碩德寶曆肇皇元花竹蕃三
谷雲霞煥九門相望清晝永朝下酒盈樽

皮氏逸亭

地僻藏吾逸，隨宜託數椽。池新何許水，楓壽不知年。竹
讓前林月，花歸隔浦天。綵鱗孤鏡照，幽哢四窻圓。曲几
清時裏，閒心太古前。入因添曉起，出每及宵眠。句得思
仙寄，棋高許客傳。乾坤餘蠹簡，勛業老航船。智有過榮
計，先求勝祖鞭。大章短柬極，夸父恨虞淵。世共稱工者，
吾知付莞然。他時耆舊傳，應指某公賢。

黃體元別業因梁為亭范德機榜玉壺水揭曼

碩賦古律余賦今律十韵

何處來奇璞，雕鏤締構，置之孤嶼外。渺在十洲中，石
色搖晴，雪林輝貫，夜虹貪寒。龍伯到愛，潔鶴仙同，拂席
柳陰綠。繡書花影，紅盃增瑪瑙，瑩簾訝水晶宮。可倩凌
人守，休令喝子通。疑神塵自遠，比德日應崇。橘窄堪容
隱，藿清亦策功。試言蔚宗輩，好為傳壺公。

送伊拉齊僉事赴南臺

英蕩來江右，人歸水鏡中。豺狼當道失，麟鳳在郊容。玉
尺嚴於已，金鈞聽以公。龍沙方集雁，烏府遂乘驄。不送

評彈巧惟恢宇量洪列城瞻朗月南夏洒清風江漾檣
竿采天搖酒影紅若為談去住猶未遠忻懽紫極星辰
切青冥雨露同遂知秣陵水直與析津通

送董方達赴廣東

與計曾偕上承恩列校官黨庠為長易藩府事人難秩
幸三年滿朝無一迹安要荒乘遠障巡徼謝儒冠行李
書籤減嚴程水驛寒庾梅留雪待韶石帶雲看歷歷多
竒境層層下激湍山藏蠻鳥怪峽東夜猿酸潮上雄都

近烟希小市

闕

蜚人行獵熟獠婦挈瓶歡俗險平為貴

民疲猛易殘長教榕蔭綠莫戀荔林丹善政宜無怠清

名自不刊九重求士急一旦在朝端味勿貪珍異衣唯

稱裕單好成南海

闕

歸權候江干

寄題凌氏橫舟閣

世有要津路居當野水潄千年濟川事一片渡人心天

地

闕

蓑老風烟弄笛沉岸花時自落沙柳坐成陰艤棹

堪誰待臨河有嘆音行車常自尼吾識固能任人物多

豪俊江山幾古今
巴東竒傑句為爾
一長吟

知非堂稿卷三